



高 去 帆

民國二十年生

專畢

現職／軍職退休

曾獲／高市 11、16 屆文藝獎首獎

教育部 81 年文藝獎佳作

82、83 年文藝獎第二名

黃山松

黃山之山多古松，盤盤鬱鬱撐青空。昂然聞世不知歲，體乾抱樸誰與同？曲蟠夭矯極盡態，鵬搏虎伏斯天工。風翻細葉逗白日，雨洗高柯迴青葱。干霄直欲叩真宰，得勢準擬探幽宮。托體堅蒼貌高古，涵濡元氣何沖融。龍鱗鐵甲戰霜雪，千磨百折成此雄。濃陰匝匝覆大地，萬象生滅開鴻濛。神完形全那得此，猶疑造化私其衷。植根絕地不住世，貞心常葆深持躬。始知處險即處坦，斧斤到此難為功。我昔聞名苦未見，既見乃知靈所鍾。黃山萬古松萬古，與天地畢長始終。

早春大寮農家

十日一雨露溉足，陂塘水滿鵝鴨浴。農機軋軋急早耕，陌上不復聞叱犢。東風著力事薰染，細柳含煙秧針綠。農婦侵曉擷園蔬，鮮嫩滿籃逾梁肉。小姑學得時世妝，描成新樣亂人目。兒童勤學結隊行，呼朋引伴聲斷續。老翁得趣復得閒，樹底道古鬥棋局。日高雞鳴犬吠籬，檐前噪雀競追逐。官吏不來戶不扃，農家農家長緝穆。

悼詩人李耆之

文字何足憑，於世無一補。旦暮隨物化，身後餘片羽。憶昔初識君，廓然見堂廡。體貌清且癯，洵洵雅談吐。耽詩事長吟，攢眉未為苦。偶爾就商酌，勤懇出肺腑。世衰道漸微，蕭艾掩蘭杜。用夷以變夏，厚令妄薄古。

君獨遵故轍，不作干戚舞。一暝遂不起，風雅誰是主？
太息人琴亡，後來孰繼武？

秋日登翠屏巖遂至鳳山水庫

山容轉清肅，澄潭鑒孤抱。落葉疾如彈，長空碧浩浩。
歲月不貸人，榮悴真草草。頻年罷登涉，坐令煙霞老。
山水不我負，重來事幽討。風物信清美，人意亦云好。
世路屯艱危，群趨在遠道。願我慕幽獨，泉石以為寶。
不競亦不營，心靜跡如捕。違俗以自烹，聞者或絕倒。

竹

高下數竿竹，當戶弄清影。朝陽集鳴禽，夜雨織幽境。
相對不曾孤，日夕嘯煙景。頗聞坡翁言，灑然心自整。
無竹使人俗，此意差能領。虛懷勵高節，君子貴內省。

重過東湖（湖在湖北武昌）

豈意餘生容繼見，江南春事罷追尋。夢回龍戰玄黃地，
世變人懷正始音。去國梁鴻應有恨，亡身龔勝詎無心。
補天空費媧皇力，陷溺憑誰起陸沉？

得友人書感賦

積雨昏昏釀暮寒，迷離燈影隔簾看。二年言笑勞魂夢，
一紙音書鏤肺肝。但使白頭身共健，不妨廣廈眼同寬。

別懷默對唐花靜，刮骨鹽終夜未闌。

台中喜晤周夢蝶

塵心客裡頻年錮，便欲因君得暫開。莫漫相逢遽歸去，
最欣小別約重來。茶能破倦何有酒，詩可和羹奚取梅。
好拾墜歡尋斷夢，不須清淺問蓬萊。

留得枯荷聽雨聲

寄懷何處覓情濃，閒向秋池認舊蹤。翠蓋憶隨風宛轉，
紅裳記共語從容。煙寒水國餘香滅，露冷蓮房墜粉鎔。
留得斷枝零葉在，夜深微雨聽吳儂。

春宵試茗

不寐酬遙夜，春寒到簟紋。試尋盤谷水，來煮剡溪雲。
茗翠分衣潤，爐香入座薰。冰腸時一煖，詩思欲離群。

秋懷

客裡逢搖落，天涯易感秋。修門勞悵望，蓬島苦淹留。
舊事空縈臆，新霜暗上頭。燕鴻虛有訊，歸夢繞南樓。

重讀寒玉堂詩

寒玉堂空深閉門，餘音誰念舊王孫；重吟細把應無奈，
別有閒愁未忍論。